

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 416164 21 St
Tuzla, 23.06.2022.godine

Općinski sud u Tuzli, sudija Antonela Đaković, kao stečajni sudija u stečajnom postupku nad imovinom dužnika „**GROMEKS**“ d.o.o. za građevinarstvo i usluge Srebrenik, ul. **Kiseljaci bb, koje u svom sastavu ima Podružnicu pod nazivom: „GROMEKS“ d.o.o. za građevinarstvo i usluge Srebrenik, Podružnica br. 1, Osmana Derviševića bb, Brčko Distrikt**, odlučujući o prijedlogu za otvaranje stečajnog postupka dana 23.06.2022.godine, donio je sljedeće:

R J E Š E N J E

I-OTVARA SE stečajni postupak nad imovinom dužnika „GROMEKS“ d.o.o. za građevinarstvo i usluge Srebrenik, ul. Kiseljaci bb, koje u svom sastavu ima Podružnicu pod nazivom: „GROMEKS“ d.o.o. za građevinarstvo i usluge Srebrenik, Podružnica br. 1, Osmana Derviševića bb, Brčko Distrikt, matični broj subjekta: 1-6846, JIB: 209336740003, broj glavnog računa: 1610500000170027 otvoren kod Raiffeisen bank BiH d.d. Sarajevo.

II-Stečajni postupak se otvara sa danom 23.06.2022.godine u 13,00 sati, kada se rješenje o otvaranju stečajnog postupka ističe na oglasnoj tabli suda. Oglas o otvaranju stečajnog postupka objavit će se u „Službenim novinama F BiH“.

III-Za stečajnog upravnika imenuje se Besim Hamidović iz Zvornika, ul. Križevići br. 173, Gušteri.

IV-Pozivaju se povjerioci da u roku od 30 (trideset) dana, od dana objavljivanja oglasa o otvaranju stečajnog postupka u „Službenim novinama F BiH“ prijave svoja potraživanja stečajnom sudu dostavom prijave i priloga u dva primjerka u skladu sa odredbama Zakona o stečajnom postupku o prijavi potraživanja (član 110. Zakona), te prilože dokaz o uplaćenju sudskoj taksi na prijavu potraživanja u iznosu od 1% od vrijednosti potraživanja, s tim da taksa ne može biti manja od 50,00 KM, niti veća od 10.000,00 KM, na žiro račun broj 1321000256000080, vrsta prihoda 722221, primalac Budžet Tuzlanskog kantona.

V-Pozivaju se povjerioci da u roku od 30 (trideset) dana, od dana objavljivanja oglasa o otvaranju stečajnog postupka u „Službenim novinama F BiH“ stečajnog upravnika obavijeste koja prava osiguranja potražuju na predmetima imovine stečajnog dužnika. Potrebno je navesti predmet na kome se potražuje pravo osiguranja, vrstu i razlog nastanka prava osiguranja kao i osigurano potraživanje.

VI-Pozivaju se lica koja imaju obaveze prema stečajnom dužniku da ih bez odlaganja izvrše.

VII-Otvaranje stečajnog postupka ima se upisati u sudski registar Općinskog suda u Tuzli, zemljišne knjige Općinskog suda u Tuzli i Općinskog suda u Srebreniku, te kod Službe za geodetske i imovinsko-pravne poslove Grada Tuzla i Službe za geodetske i imovinsko-pravne poslove Grada Srebrenik.

VIII-Skupština povjerilaca (ročište za ispitivanje) na kojem će se ispitati prijavljena potraživanja zakazuje se za dan 03.10.2022.godine u 09,00 sati, u zgradi Općinskog suda u Tuzli, ulica ZAVNOBIH-a bb, sudnica S4-prizemlje.

IX-Skupština povjerilaca (izvještajno ročište) na kome će se na osnovu izvještaja stečajnog upravnika odlučiti o daljem toku stečajnog postupka **održat će se istog dana 03.10.2022.godine na istom mjestu nakon ročišta za ispitivanje prijava potraživanja.**

X-Rješenje o otvaranju stečajnog postupka u cijelosti objavit će se na oglasnoj tabli suda, web-stranici suda – elektronskoj tabli suda, na internet stranici FIA-e, a u Službenim novinama F BiH objavit će se samo izreka rješenja.

O b r a z l o ž e n j e

Predlagač-povjerilac Hazim Muratović iz Srebrenika, putem punomoćnika, podnio je ovom sudu dana 02.12.2021.godine prijedlog za otvaranje stečajnog postupka nad dužnikom GROMEKS" d.o.o. za građevinarstvo i usluge Srebrenik, ul. Kiseljaci bb, radi platežne nesposobnosti navedenog dužnika, jer isti ne ispunjava svoje novčane obaveze. Dana 04.02.2022.godine predlagač je dostavio uređen prijedlog, a dana 14.02.2022.godine dopunjen prijedlog, sve po nalogu suda.

Nakon razmatranja prijedloga i uređenog prijedloga, te ročišta o saslušanju predlagača i dužnika, sud je rješenjem od 16.03.2022.godine pokrenuo prethodni postupak radi utvrđivanja uslova za otvaranje stečajnog postupka i imenovao privremenog stečajnog upravnika na osnovu odredbe člana 61. i 63. Zakona o stečaju FBiH (Službene novine F BiH, broj 53/21).

Privremeni stečajni upravnik je u spis suda dostavio izvještaj o provedenom prethodnom postupku sa nalazom i mišljenjem na okolnosti postojanja razloga za otvaranje stečajnog postupka. Na osnovu odredbe člana 102. stav 1. i 2 Zakona o stečaju FBiH (Službene novine F BiH, broj 53/21) zakazano je ročište radi ispitivanja uslova za otvaranje stečajnog postupka i razmatranja izvještaja privremenog stečajnog upravnika, na kojem je saslušan privremeni stečajni upravnik i punomoćnik predlagača i punomoćnik dužnika-protivnika predlagača, teisti nisu imali primjedbi na Izvještaj privremenog stečajnog upravnika o provedenom prethodnom postupku dostavljenog sudu dana 08.06.2022.godine. Iz izvještaja privremenog stečajnog upravnika koji je razmatran na ročištu dana 23.06.2022.godine proizilazi da je za društvo dužnika registrovano pod matičnim registarskim brojem subjekta upisa: 1-6846, da društvo u svom sastavu ima Poslovnu jedinicu br. 1. Brčko Distrikt, da je oblik svojine privatni, društvo osnovala dva fizička lica sa po 50 % udjela. Osnovna djelatnost društva je gradnja stambenih i nestambenih zgrada. Društvo je poslovnu djelatnost obavljalo u iznajmljenim prostorijama na adresi Kiseljaci bb, Srebrenik. Transakcijski računi društva su blokirani, a društvo ima neizmirenih obaveza u iznosu od 4.774.244,16 KM, a one se odnose na obaveze prema dobavljačima u iznosu od 1.338.507,44 KM, po osnovu pozajmica osnivačima društva u iznosu od 1.254.176,00 KM, obaveze po primljenim avansima 1.969.401,11 KM, ostale obaveze po pozajmicama u iznosu od 43.200,00 KM, obaveze po osnovu neto plaća 44.546,15 KM i prema Poreznoj upravi FBiH za poreze i doprinose u iznosu od 124.413,46 KM. Na dan pokretanja prethodnog postupka društvo je imalo prijavljena tri zaposlenika. Privremeni stečajni upravnik je formirao komisiju kako bi se izvršio popis potraživanja, obaveza i imovine dužnika, te je utvrđeno da dužnik ima kako pokretnu tako i nepokretnu imovinu, međutim veći dio nepokretne imovine je prodat (stanovi, poslovni prostori, parkinzi) ali kupci se nisu uknjižili u stvarnosti, te će se stvarno stanje vlasništva utvrditi u stečajnom postupku.

Prema izjašnjenju privremenog stečajnog upravnika, društvo ima imovine koju bi obezbjeđivao i o kojoj bi se starao privremeni stečajni upravnik, imovina stečajnog dužnika može pokriti troškove stečajnog postupka, te postoje razlozi za otvaranje stečajnog postupka, a poslovanje dužnika se može nastaviti u cjelini ili pojedinim dijelovima u toku

eventualno otvorenog stečajnog postupka, a nastavak poslovanja bi se ogledao u sređivanju dokumentacije i pripremama za završetak započetih investicija koji imaju karakter nedovršene proizvodnje.

Na osnovu izvedenih dokaza tokom postupka utvrđeno je da je prijedlog za pokretanje stečajnog postupka dopušten, zbog nesolventnosti i nelikvidnosti dužnika postoji stečajni razlog, a iz sredstava uplaćenih na ime pokretanja prethodnog postupka za utvrđivanje uslova za otvaranje stečajnog postupka (uplaćeno 10.000,00 KM) mogli bi se finansirati troškovi postupka, o čemu se izjasnio i privremeni stečajni upravnik na ročištu za ispitivanje uslova za otvaranje stečajnog postupka od 23.06.2022.godine. Shodno navedenom, sud smatra da su ispunjeni uslovi za otvaranje stečajnog postupka nad imovinom dužnika.

Sud je shodno odredbi člana 102. stav 9. a u vezi sa članom 6. Zakona o stečaju F BiH (Službene novine F BiH broj 53/21), odlučio kao u izreci rješenja.

Odluku o imenovanju stečajnog upravnika, sud je donio shodno odredbi člana 104. stav 1. Zakona o stečaju F BiH (Službene novine F BiH broj 53/21), a nakon što je utvrdio da isti ispunjava uslove utvrđene odredbom člana 71. istog zakona.

Sud je, odluku o određivanju ročišta za ispitivanje prijavljenih potraživanja i izvještajnog ročišta, donio na osnovu člana 106. Zakona o stečaju F BiH (Službene novine F BiH broj 53/21).

Odluku o objavljivanju otvaranja stečajnog postupka, sud je donio shodno odredbi člana 107. stav 1. Zakona o stečaju F BiH (Službene novine F BiH broj 53/21).

Na osnovu odredbe člana 105. Zakona o stečaju F BiH (Službene novine F BiH broj 53/21), sud je uputio odgovarajuće pozive povjericima i dužnicima stečajnog dužnika.

Upis otvaranja stečajnog postupka u javne registre određen je na osnovu odredbe člana 108. Zakona o stečaju F BiH (Službene novine F BiH broj 53/21).

Stečajni sudija

Antonela Đaković

POUKA O PRAVNOM LIJEKU: Protiv ovog rješenja žalbu može uložiti stečajni dužnik. Žalba se podnosi Kantonalnom sudu u Tuzli, putem ovog suda u tri primjerka u roku od 8 dana po proteku pet radnih dana od dana objave rješenja u Službenim novinama F BiH. Žalba iz prethodnog stava ne odlaže izvršenje rješenja.